

續修廬州府志

卷九十九

淮軍戰事編

平於縣下

卷一百

淮軍戰事編

卷九十九

續修廬州府志卷九十九

花翎道銜江南安徽廬州府知府清泉黃 雲總修

平捻紀畧

下

八月二十一日鼎盛兩軍分路進勦二十三日邀擊於沂河東岸生擒賊首周毛兒賊遁二十四日我軍至邳州城賊馬迭來撲犯擊退之追至邳北溝上鼎軍擒賊目黃得宜賊敗循沂河北走二十九日我軍追抵邳城賊又東竄海州鼎盛兩軍合進三十日抵海屬之雙石舖時賊全股踞房山一帶九月初一日我軍發石榴寨突遇賊馬斬殺十餘騎賊馬步結數十團陣來突我軍以炸礮擊之賊大潰連夜竄走西南初二日盛軍仍由

續修廬州府志

卷九十九

平捻紀畧下

一

石榴寨向南抄擊鼎軍由房山東追賊以馬隊拒我軍列礮於前賊騎驚散步隊乘勢掩殺步賊亦回拒戰兩時許賊始潰追至安峯山初三日賊游騎突犯宿遷之邵店盛軍循安峯山緊躡賊後逆眾貫行如蟻我軍迫之賊以馬隊綴我師而抱隊急走午刻追至沐陽之高家寨盛軍出隊奮擊營官童邦傑持矛突入賊陣往來數十合裹血而歸各營槍礮迭進賊死無算鼎軍亦至奪賊百餘騎賊潰走是夜盛傳潛襲賊館破其三寨餘賊皆走初四日我軍追抵海州之阿湖鎮鼎軍先至鼎新先分其軍爲三路左路以張棟材爲頭隊張景春二隊潘國揚三隊萬國順四隊右路以潘國英爲頭隊潘

鼎立二隊竇汝田三隊趙孟昆四隊鼎新自率潘錦等小隊爲中路時賊留馬步悍眾萬餘於阿湖鎮據高岡以待鼎新督各營嚴陣不動賊騎不敢近步賊以長矛數十團陣夾馬衝突我軍擊之賊三進三卻賊又結隊再進適盛軍由南進時步賊結五團陣每團數千人提督周壽昌率五哨敵賊五陣突入賊中傷脅負創陷陣破其三團孫顯寅率後營繼進任逆見勢不支率內五營悍賊接戰總兵衛汝貴迎擊之各營乘勢齊進童邦傑然炸礮轟擊賊敗有趙添幅者逆首任柱死黨當塵戰時添幅手大旗居前以進退羣賊忽開花礮彈炸落其顛羽翼七人一時俱斃賊因闕潰鼎軍遂由東路兜

勦賊向北竄是時賊盤旋海沐邾宿之交圖乘隙竄撲運河鴻章嚴飭運防各軍晝夜備之時銘鼎軍逐賊而行凡賊所到城寨緊閉購糧甚艱軍士皆忍饑荷戈鴻章令銘軍就運河灘上一帶休息一面檄催買糧以恤兵饑時值福建陸路提督郭松林病愈來營鴻章卽以前松字各營改爲武毅軍並抽撥運防馬步湊集二十營交令統帶並爲奏請

詔如議

九月二十九日鴻章自臺莊復移駐濟甯令徐州鎮總兵董鳳高帶小隊移駐臺莊北岸涼州鎮總兵周盛波督盛字全軍移紮韓莊八閘初鼎盛兩軍克賊阿湖鎮

之時劉銘傳卽帶八成行隊由邳州灘上迎擊馳抵邳城是時賊爲鼎盛兩軍新敗竄踞石榴寨以東並牛山一帶初銘軍東向迎截行至王堰地方值各賊踞館休息銘傳派善慶陳振邦馬隊從兩旁抄襲黃桂蘭唐定奎步隊隨後接應自率親兵兩營中軍五營繼進善慶等衝至王堰賊館賊大驚潰銘傳親督馬步乘勝踵追二十餘里逼牛山而營賊聚房山一帶陳振邦知賊未定乘夜掩襲派降酋鄧長安馬金叙等率馬勇三百名潛伏賊館後漏下三鼓襲奪賊館十餘處殺賊百餘任賴各酋驚竄北趨贛榆是時各軍糧盡薪芻皆絕銘軍遂回邳州盛軍回臺莊鼎軍回郟城就糧賊乘隙由郟

邳境內走向西北十一日鼎軍遇賊於郟城之馬頭集銘軍亦由邳州尾追十二日陳振邦馬隊及賊於邳州蘭山縣交界之梁丕山叻鹿山一帶賊日夜不得停息生擒任柱左營領旗逆首王成章賊望風而逸十三日竄紅山蘭陵十四日入嶧縣山中值馬隊溫德勒克西馬德順等循山南兜勦賊奔滕縣一路鴻章嚴檄東境防河之淮軍楊鼎勛鄂軍譚仁芳劉維楨豫軍張曜宋慶等密切扼守又因豫軍汎地較短兵力較厚飭宋慶酌抽行隊在東平汶上就近游擊時黃水大沈口戴廟南北岸平地水深數尺隄牆大半坍塌壞戴廟一段爲豫軍汎地防軍避水移靳口東岸鴻章自率親軍移扼要

地於二十五日由臺莊前進二十九日駐軍濟甯賊又爲鼎軍所敗由新泰蒙陰南走初鼎軍於十六日抵滕縣之臨城驛適賊由嶧境出竄潘鼎新督隊且戰且走至柴戶店賊大股來犯總兵張景春吳從發等分路迎擊賊退回東路山下十八日賊數千復來偷襲鼎新先設伏於叢薄中設虜兵誘之賊果來迫伏發擊斃馬隊賊首陳金福楊添燕餘眾潰走十九日各營分進兜剿賊亦分兩路迎拒我軍槍礮環擊騎賊先敗步賊亦潰直由滕縣大路北趨犯濟甯南陽湖水師徐道奎分頭扼堵鼎新亦馳至濟甯二十一日賊遂由兗州竄甯陽邊馬向濟甯迤北奔竄二十二日又爲豫軍所敗二十

三日東走泰安折向東南大路狂竄知運防之密不敢窺伺二十四五等日由新泰蒙陰南走將回竄沂莒鴻章飭徐州鎮總兵董鳳高帶小隊移駐臺莊北岸涼州鎮總兵周盛波移駐韓莊八閘又飭劉銘傳將受傷弁勇留守邳州老營休息酌帶精銳逐賊截勦並因古州鎮總兵劉士奇病未痊所部奇字馬步八營與南贛鎮總兵王永勝開字馬步十一營兵力過單飭將奇字營併歸郭松林統領開字營併歸楊鼎勛潘鼎新分統以厚其力

九月二十九月初一等日捻逆折由沂水越嶺東趨初三四日竄及青州淄川長山初六日突犯章邱旋於

齊東縣河套伺搶民船欲渡爲守河礮船轟斃數名不得過初九初十兩日悉數向青州回走時劉銘傳奉檄由邳州灘上拔隊迎勦抵沂州知賊在東路卽由沂水穆陵關向青州進潘鼎新奉檄以濟南戒嚴率部由濟甯逕趨省城十四日抵肥城聞賊東竄亦折由泰安東躡鴻章以鼎軍馬隊過少添派霆軍記名提督唐仁廉統仁字三營並親兵馬隊馳往泰安與鼎軍合兵進勦並飭福建提督郭松林統帶武毅奇字各營馳赴濟甯與湖南提督楊鼎勛所部勦開各營會合續進時鴻章所部淮軍爲游擊之師者三枝劉銘傳與潘鼎新各爲一枝郭松林楊鼎勛併爲一枝每枝均及萬人皆視賊

所向躡踪追勦其運隄防守者則各有地段自濟甯南至石佛一帶楊鼎勛留營分守者也韓莊八閘一帶周盛波周盛傳分守者也大泛口至灘上一帶鄭國魁張桂芳孔昭右等分守者也灘上至貓兒窩一帶銘軍於游擊師中留各營二成隊分守者也李昭慶及劉秉璋本接守宿遷仰化集下至清江之楊莊漕督張之萬令移六塘河與漕督所部及浙皖之師聯紮昭慶以四營仍駐運西原段以四營斜紮六塘河十餘里至詹莊劉秉璋所部則全移六塘河張廟至白草溝與各軍分守計各軍防扼東蘇運河及六塘河地段共三百五十餘里十月十七日銘軍大敗賊於濰縣之松樹山捻逆

齊東被礮船擊退後大股東竄青州連擾樂安壽光境內因濰縣有糧卽竄踞飽掠銘軍方由沂水繞出穆陵關十月十六日行抵鄆郡聞賊尙踞安邱濰縣一帶銘傳派叅將陳鳳樓率馬勇百名前探行至臨河寨見有賊館陳鳳樓潛襲之生擒任逆外五營賊目潘債并其黨十餘人銘傳恐賊股聞風遠遁乃督軍於四鼓拔隊十七日黎明至臨河寨見賊踞松樹山下一帶馬步重疊縣亘數十餘里銘傳分軍三路以劉克仁左軍六營同善慶馬隊五營爲一路唐定奎右軍六營同陳振邦馬勇五營爲一路銘傳自率劉盛休滕學義等中軍六營并親兵兩營爲一路令陳鳳樓徐邦道率馬勇兩營

先致師比及賊營徐邦道陳鳳樓大呼衝入賊不虞我軍之驟至也捨死拒戰銘傳以中軍攻其中堅右軍軍其左右軍軍其右分道抄擊賊分三處不能會合我軍三路并進將松樹山以西賊館十餘處賊眾二千餘人全數撲滅生擒藍旗賊首張斯潘德楊三注等三名陣斬賊目王雙如等時任逆率馬步二千餘由東路來援賴逆亦率馬步三千餘由南路齊至銘傳自督中左各營東拒任逆分派陳振邦唐定奎南擊賴逆賴逆不敢抗卽率黨回竄任逆踞牟山頂下窺善慶陳鳳樓等鷺擊十餘次劉克仁劉盛璋率步隊繼進疊放排槍賊潰向牟山東走我軍合兵踵追數里任逆復同牛逆白旗

步賊數千併力回拒劉克仁滕學義徐邦道追至合擊
適陳振邦唐定奎逐退賴逆亦出東路進戰任牛兩酋
遂驀過汶河向安邛城北竄走銘傳卽督令各軍由汶
河南岸跟追賴逆不戰先潰竄往牟山之南爲大軍所
隔任牛二逆由安邛城西潛行欲與賴逆合銘傳在山
頂督軍見之卽令步隊疾趨斷任逆之路又派陳振邦
善慶溫德勒克西徐邦道陳鳳樓等帶馬隊合擊賴逆
追至東嶺賴逆所部逃者半僅存步賊千餘馬隊四路
抄擊擒斬殆盡生擒僞酋張大宥等任牛各逆勢窘亦
繞向安邛東北由高密諸城一路南竄時鼎軍自肥城
改道泰安博山臨朐出穆陵關來會郭松林武毅全軍

整練已齊亦與楊鼎勛所部勛開各營取道沂郟兜勦
十月二十四日劉銘傳敗賊於贛榆初牟山之捷賊勢
漸解殘眾向諸城南趨劉銘傳督率馬步各軍兜躡二
十二日追至日照地方先鋒馬勇接戰槍傷僞魯逆任
柱右耳際任逆逕奔江蘇贛榆縣境二十四日銘傳同
善慶踵追及之任逆裹創決戰預選馬步悍賊數萬設
伏城東民村林後銘傳率眾抵城探知賊伏情狀乃派
善慶溫德勒克西由城東進陳振邦徐邦道陳鳳樓等
由城西進陳振邦等甫過西關正遇牛賴兩股馬步賊
數千陳鳳樓等率馬勇迎擊騎賊稍卻步賊復持矛夾
進唐定奎步隊揮戈出迎銘傳又派劉盛休等接應任

逆率悍眾橫衝而來銘傳親督隊伍敵牛賴股而令善慶抵任逆任逆殊死鬪善慶恐馬隊衝動令各旗弁兵下馬結陣拒戰而以洋槍排擊賊死亡相藉忽黃霧四塞昏不見人銘傳派劉克仁步隊六營及丁壽昌滕學義乘霧由城北繞出賊後時牛逆一股已已爲唐定奎陳振邦等擊走賴逆亦敗遁我軍萃於任逆賊眾分股相拒俄頃劉克仁丁壽昌等已襲其後賊陣始擾銘傳善慶督馬步大呼因勢衝殺煙霧中忽聞大聲呼曰任柱中槍斃矣賊眾驚譟遂大奔銘傳善慶揮軍追擊二十餘里先是有僞內五營頭目潘貴升者投入陳鳳樓馬隊營內請殺任逆是日潘貴升密言於哨官鄧長安

於煙霧之際效賊旗幟入賊陣中乘任逆不虞施槍洞其腰脅飛馬回陣賊黨同時奔潰任柱原名化邦亳州人爲捻賊各股總頭目將騎得法飄忽善戰一旦授首人心大快二十五日僞逆宗賴賜福率三十餘騎來降捷聞奉

旨直隸提督劉銘傳忠勇耐勞追賊迅疾著加恩賞給白玉柄小刀一把火鏢一個大荷包一對小荷包一對將士均得優獎

十月二十八日潘鼎新敗賴汶洸於海州上莊鎮任柱既斃賊中推賴汶洸爲首潘鼎新追及於海州之上莊鎮派提督戴春林馬步隊設伏叢薄中以潘國揚六營

迎戰吳從發兩營當左路張景春兩營當右路潘鼎立兩營與聶桂榮等四營擁護後隊爲聲援賊先以馬隊致師潛分兩翼橫襲我軍張景春等奮擊敗之賊馬步大隊奮進吳從發嚴陣不爲動鎗礮子如雨下賊斃相枕藉而衝突如初潘國揚等幾不支鼎新自統親軍馬隊大進各營乘勢奮入殺賊過半賊大潰我軍追三里餘方收軍馬賊又裹創回擊前隊爲賊猛撲稍卻潘國揚立斬先退者揮軍更鬪賊復奔戴春林伏軍發於樹林中前後夾擊斬步隊賊酋任金保僞內五營頭目李宗詩率馬賊五百餘名來降是時銘軍由贛榆進唐仁廉馬隊由沂川進楊鼎勛郭松林大隊亦會師郟城

十一月初十日劉銘傳督軍大破賊於濰縣壽光間賴逆自上莊鎮敗後走贛榆沙河鎮北知郟贛一帶官兵雲集十月二十九日沿海北趨日照之濤雒夾倉各口十一月初一日鼎軍踵至初二日賊竄諸城初四日鼎軍追及諸城兩城集將至兩城集步賊伏集後深林中馬賊平地誘戰鼎新飭步隊列陣以待馬隊分東西路迎擊伏賊驟起從岡嶺三路壓下鼎軍屹不少動以馬步分迎之賊敗奔是時銘軍由沐陽高溜集進武毅軍勛軍由諸莒進賊向東北竄盤旋於壽光昌邑濰縣之交初五日折回諸城膠州境遇鼎軍望風遁初六日鼎軍過畱武關賊竄高密初七日鼎軍至油溝賊竄昌邑

初八九日鼎軍至北蒙賊又折向濰縣先是劉銘傳兼程赴濰初七日行抵諸城東十餘里遇賊北竄銘傳派善慶等馬步各隊進擊賊折向東走追北四十餘里步隊至巴山馬隊至注溝賊騎千餘回鬪爲陳鳳樓徐邦道等所敗斬紅旗賊酋鄭馬糊生擒藍旗賊目張定柱賊向東北狂竄時賴牛各逆鬪竄海邊沿湖沿黃擴糧銘傳恐賊竄青濟黃防喫重拔隊連夜由安邱間道馳抵濰縣攔勦初十日賊竄至濰縣東北安垆地方突見旂幟大驚銘軍乘其不虞壓賊陣而軍會安義鎮總兵唐仁廉仁字三營及親兵營馬隊咸至會戰薄暮逆眾赴各村潛匿任逆舊部藍旗股賊向安垆東北牛李各

股向西北壽光一帶銘傳派陳振邦先鋒馬勇與丁壽昌步隊由東路兜擊藍旗賊股親督劉克仁唐定奎滕學義劉盛休等步隊並徐邦道陳鳳樓馬隊由正北進善慶溫德勒克西由西北進復令唐仁廉由正西繞向東擊約五鼓在安垆鎮東北會兵其藍旗賊股館較近初鼓時爲先鋒馬勇襲破十餘處大股驚覺倉皇迎拒陳振邦率勇搏戰正相持間善慶等馬隊滕學義劉盛休步隊亦至逆眾倚民莊爲巢穴劉克仁唐定奎兩軍衝入賊中擊散數館唐仁廉亦於正西奪擊他賊館數十里間人聲鼎沸全股潰散時新月初升我軍乘月沿村搜殺餘賊向東北逃走銘傳督親兵沿河跟追西抵

稻田四十餘里月落夜黑各軍分追惟聞鎗聲喊聲停而復起銘傳從火光中急行二十餘里至壽光境之仇家莊遇唐定奎一軍攻破牛逆踞館牛逆潛逃天將明唐仁廉督馬隊追賴牛二股至海濱方收隊回十一日卯刻賊復由西北回竄善慶徐邦道等迎擊之辰刻眾逆合股復由東北而來仍向西走銘傳急督各營攔擊劉克仁當白旗牛逆李逆兩股唐定奎當藍旗任錠任三厭劉三貓兩股滕學義迎擊馬賊銘傳親督劉盛休五營接應吳宏洛大呼衝殺白旗賊股先敗各軍乘勢齊進賊眾全潰唐仁廉陳鳳樓率馬隊抄攔賊前賊梟水回遁我軍追至禹王臺賊向東南敗奔遂收軍收降

白旗賊酋盧金輝鈕洪章尹已端黃文隆四股共二千人時郭松林楊鼎勛兩軍亦由諸城等處進勦十二日至濰縣東南杞城瞥見塵沙大起賊股狂奔而過松林揮軍要截鼎勛居右松林居左犄角進逐馬隊當前步隊繼之戰於流黃鎮吳鳳柱張朝山易用剛率騎兵衝賊吳鳳柱胡連發等躍馬手刃賊目多人賊後爲銘軍尾追前復與松林等軍遇旁限濰河汶河力戰求生步賊居中騎賊分兩翼松林等親督李長樂宋德鴻張正全陳飛熊王萬釗張海龍唐宏成高占彪等併力奮擊蹙賊一隅每排鎗發卽開一血路賊皆渡河東走我軍梟渡進擊追至余家寨始收隊捻逆敗竄汶濰由高安

南趨各軍仍銜尾分路緊躡時淮軍游擊之師已全趨東路而賊屢出沒昌濰壽光之交運防不能稍疏朝廷深恐黃河防軍有失屢

詔飭籌協防於是淮軍盡出值直境梟匪蜂起直督告急鴻章以黃河爲

畿京天塹關係甚重然當此兵力支絀之時祇能擇要扼守因奏言黃河之可慮者惟張秋至利津海口八百餘里然水深溜寬人馬何能飛渡但得地方大吏認真嚴飭各津渡口將所有船隻泊近北岸稍有警報卽勤梭巡賊亦不能潛渡矧直東河防上下水陸已有直軍八千東軍二千足敷駐守禁防之用惟恐節屆隆冬嚴寒

凍冷賊或可履冰而渡然歷年河之易冰者亦僅自張秋至東阿魚山六十里其地皆在東境旣東軍不能力扼自當於運防中竭力抽撥協防茲酌調記名總兵張樹屏所帶樹字三營及淮勇洋鎗隊於本月初七日由運防拔隊北行卽認守張秋一段此防向歸直隸臬司張樹聲與唐訓方分守因飭此軍到防卽歸張臬司調遣又以直省梟匪未靖兵饟難籌所有樹字三營月饟仍由蘇州一體籌濟奏入報可

十一月十三日諸軍乘勝向東南追勦行抵夏灣賊正奔竄望旗潰散收降任逆外五營陳懷忠馬賊千餘人十四日追一百三十里十五日及賊於膠州之鄭家寨

十七日黎明大霧賊乘昏暗時繞出兩城集山中欲潛竄鼎勛松林率隊梭巡遇之回軍截追賊由東北沿海潰走十八日潘鼎新唐仁廉會兵追抵諸膠交界之劉午關賊竄唐仁廉窮追賊遂折由山內急走潘鼎新督軍追至丁家村賊目王占鰲率馬賊二百餘人來降十九日潘鼎新繞出賊前二十日黎明遇賊於膠州之小南溝乘其未備衝擊賊拋棄牲畜器械沿路不絕潘鼎新唐仁廉嚴飭各營不准攜取盡力掩殺斃賊甚多所餘僅髮捻老賊追二十里天忽大霧賴牛等逆乘霧併力回犯唐仁廉同龍太勝徐連陞等橫衝賊隊適鼎軍亦至首尾夾擊陣斬粵逆僞奏逆賴世就賊目張向春

趙林高率馬賊六百餘步賊千餘來降餘賊由高密濰縣昌樂臨淄北趨二十四日劉銘傳郭松林楊鼎勛潘鼎新會集於安邱分路兜逐二十五日潘鼎新由濰昌繞往長山攔截西竄濟南之路劉銘傳郭松林等逕赴青州會勦二十六七日各軍抵青郡賊已西走各營裹糧日夜追之二十八日賊竄新城縣境旋折竄壽光縣界二十九日我軍自南而北逼賊於海濱南北洋河巨瀾河之間逆旣迫險背水死戰於是松林鼎勛軍其東銘傳軍其西逆首牛逆子親持長矛率步賊四五千人任定率藍旗步賊三千餘賴汶洸李允皆驅黨親抗馬賊分兩路來撲任三厭迎抵易用剛張朝山陳鳳樓徐

邦道諸軍白旗馬賊迎抵善慶陳振邦兩軍西路唐定奎劉克仁選鋒衝入牛逆股匪中牛逆先敗仁逆藍旗股爲郭松林楊鼎勛及劉銘傳中軍所壓馬隊抄其後遂大奔先棄步賊後棄輜重馬匹我軍皆不顧由洋河追至瀾河僅餘馬賊數百名潰走是陣殲粵逆餘黨范汝增徐昌先餘賊匿跡南奔適會西捻張總愚由秦省搶渡黃河犯山西吉州

詔宋慶程文炳張曜三軍分道入晉援防河北張曜宋慶率豫軍原防戴廟至靳口運牆而東鴻章念晉省毗連畿輔不可以不先所急卽派記名提督吳雲集添募小隊並帶仁字兩營馬隊赴戴廟替防檄飭宋慶張曜兩軍尅

續修廬州府志

卷九十九

平捻紀畧下

十四

日馳赴河北防勦

十二月十一日餘捻突過六塘河竄至揚州統帶華字營淮勇卽選道吳毓蘭生擒僞遵逆賴汶洸東捻蕩平鴻章疏善後事宜及部將勞苦乞歸情形得

旨報聞

七年正月西捻張總愚突竄畿南自五年九月十一日張逆與任賴分股張總愚自中牟南竄許州爲江蘇臬司劉秉璋所敗卽西竄襄邾由山路犯汝州自洛河南岸折竄龍門白沙掠宜陽永甯六年正月劉松山張錫鏞等率兵趨援與賊鏖戰累日編修張錫鏞陣亡劉松山力戰獲勝賊少退由鄆縣西竄塾屋因渡渭至扶岐

劉松山躡追而西無戰不捷迭克銀渠金渠臨平等鎮
賊寨並大小堡寨百餘處三月十五日擒獬悉由武功
東竄劉松山會同黃鼎安住等軍折由大北溝赴興平
截勦賊遂由蒲城飛竄同朝一帶時陳湜督軍嚴守禹
門以上閩鄉一帶又有豫軍馬德昭駐紮老河口河水
正漲賊無可渡而黃鼎安住郭寶昌劉松山等軍轉戰
相逼是時

欽差大臣陝甘總督一等恪靖伯左宗棠奉

命入關勦賊各軍聲勢更壯至四月二十四日劉松山復敗之
於元其寨穀祿莊追至省城南山門口斃賊三千餘名
生擒頭目及悍逆八百餘人奪獲騾馬一千五百餘匹

續修廬州府志

卷九十九

平捻紀畧下

十五

五月初一日又敗之鄆縣少義防遂由鰲厓橫出郭公
祠竄渡渭北桑家莊一帶奔竄渭河南北往來鄆杜之
交旋竄陷綏德分擾米脂以十一月二十二日由龍王
廟乘河水凍合呼嘯過河犯山西之吉州鄉甯諸處平
蒲並警豫撫檄馬德昭一軍渡河援守運城急調張曜
宋慶兩軍回豫而賊已由絳州曲沃垣曲山僻小路竄
近豫疆十二月初九日過邵原關竄濟源縣及河內武
涉温孟獲嘉輝縣新鄉原武各境浸有內犯

畿輔之勢

詔促督師李鴻章內援並飭催劉銘傳善慶温德勒克西馬步
各營迅赴河北進勦銘傳值傷疾驟發不能乘騎請三

月假未滿溫德勒克西善慶馬隊各部皆出征十餘年
疲病思歸久無鬪志鴻章愷切獎勵勉以大義又以所
部太單無步隊依護不能專當一面乃檄調總兵周盛
波周盛傳等馬步十一營並潘鼎新鼎字全軍與善慶
溫德勒克西馬隊由東阿進發並督催楊鼎勛郭松林
繼進鴻章擇要布置後路各事刻日親行而賊騎飈疾
一日夜奔馳二三百里正月由磁州廣平直犯順德鷄
澤平鄉鉅鹿隆平各處

畿南震擾鴻章疏陳辦流寇以堅壁清野爲上策嘉慶初
年川楚教匪辦理十數年卒賴此以收功卽任賴捻股
流竄中原數省畏圩寨甚於畏兵豫東淮北民風强悍

被害已久逐漸添築圩寨深溝高壘到處與城池相等
是以捻逆一過卽走不能久停肆擾近年惟湖北陝西
被擾最甚以素無圩寨籌辦不及賊得盤旋飽掠其勢
愈張直晉向無捻患民氣尤爲樸懦未能築寨自守張
總愚本極狡猾又係窮寇南有黃河之阻必致縱橫馳
突無處不流百姓驚徙蹂躪詎有已時徒深浩歎且
畿疆河北平原曠野古稱四戰之地無險可守辦流賊與
辦守城踞寨之賊情形迥異流賊專於避兵守此則竄
彼迎左則趨右交臂旋失情勢使然非盡兵將之不力
也聞該逆自竄陝西北山後渡黃入晉沿途擄獲騾馬
愈眾步賊多改爲騎我軍騎少步多卽騎兵每人不過

一馬追逐病斃卽已無馬視賊匪每人可二三騎隨地
擴添情形則又迥異自古辦賊必以彼此強弱饑飽爲
定衡賊未必強於官軍但彼馬多而我馬少自有不相
及之勢彼可隨地擴糧我須隨地購糧賊常飽而兵常
饑又有不能及之理今欲絕賊糧斷賊馬惟有苦勸
諭直隸山西河北紳民趕緊堅築圩寨一有警信收糧
草牲畜老弱丁壯於內既自固其身家兼以制賊死命
及今爲之亡羊補牢尙未甚晚若待深受荼毒再議補
築經費更難措籌如果十里一寨賊至無所掠食其技
漸窮或可尅期撲滅伏乞

皇上特頒訓諭諄飭地方官紳妥爲籌辦實力奉行於軍務大

續修廬州府志

卷九十九

平捻紀畧下

十七

局裨益匪淺奉

旨嘉納又以行軍須急籌糧淮軍北援恐直隸地瘠民貧米珠
薪桂不能籌給兵食奏請撥借津倉粳米二三萬石儲
存河間大名保定等處以濟客軍並請

勅下直督嚴飭地方官豫提公欵購存糧草麵料儲備各營給
價取用

詔并行之時直境戒嚴淮軍皆疲乏不堪而

中旨以赴援不力屢見詰責鴻章乃上疏畧陳曰查臣軍自入
東勦捻以來任賴等股約十萬眾肆擾東境凶燄鴟張
臣每念此賊不平則中原之禍靡有已時卽西北之憂
亦未有艾而滅賊大計要必於冬春之交乘其饑困併

力殄除故於運黃兩防布置穩固後卽選將并兵與之角逐嚴督將尅日圖功諸軍耐凍忍饑日馳百數十里始棄輜重後并鍋帳而棄之各裹乾糧日夜奔逐用能仰託

威福倖立寸功自壽光大捷以後餘賊全趨海贛下走淮揚東境已無賊蹤東軍亦早回防休息而臣軍仍乘勝南下直追至揚州分至安徽之盱眙五河等處生擒巨獠殄平餘孽年底始克蕞事劉銘傳善慶温德勒克西於十二月十五六日分起馳回邳州灘上老營潘鼎新郭松林楊鼎勛諸軍於十二月二十九三十正月初二三等日先後回至濟甯老營解甲暫息臣親加拊視各士卒皆手胼足胝衣履不全疲憊不堪馬匹倒斃大半迭經奏明有案仰荷

聖慈准暫予休息合營感戴

皇仁皆歡呼雷動劉銘傳三年轉戰勞苦尤甚積受寒溼手足麻木瘡疥徧體不能乘騎臣因該提督素資得力囑其始終奮勉毋得偷安目擊狼狽情形策勵之餘實深矜憫臣以勦辦東捻爲己責初不料西捻張總愚一股由山右直趨河朔又肆蔓延慮事之疏咎無可辭先奉

諭旨准劉銘傳將所部稍爲休養整頓正月初旬迭奉諭旨催令劉銘傳善慶等赴河北進勦臣卽嚴飭各營趕緊汰去病弱添補缺額制辦衣履整備鞍馬不准刻延向來

游擊之師疲勞已甚須休養整練兩三月然後可用今
尙未及兩旬也各營向以火器制勝子藥槍礮軍裝均
須配帶自去冬輕騎逐賊鍋帳輜重沿途拋棄寄頓今
奉調遠征必應逐漸收集并令添補又糧臺分設徐州
清江領給餉銀往來千里動需時日軍中事件繁瑣有
一不給難以遠行臣倉猝登程徒有赴援之名必難責
赴援之效臣深悉兵艱催令起程亦不能不畧待齊備
將領各知大義既入援
畿輔斷不敢有意逗留茲奉

諭旨知賊勢深入

畿疆臣聞信之餘五中欲裂恨不能奮飛馳援稍舒

續修廬州府志

卷九十九

平捻紀畧下

十九

君父之急一切籌備各項亦無暇逐細經營除劉銘傳患病屬
實已乞

恩稍予養息暫難成行外潘鼎新鼎字全軍並善慶溫德勒克
西馬隊已於正月十六日拔營飭令兼程由東阿德景
進發唐仁廉馬勇於十八日跟蹤北上郭松林楊鼎勛
武毅勛字等營陸續遄發臣俟周盛波所部由徐州調
到擬於二十日親督啟行由東入直查勦捻非馬步大
隊不能得力直境地勢平曠尤須用眾臣軍強弩之末
遷地弗良事機所值敢稍推諉但冀沿途地方官能爲
預備芻糧俾無缺乏必當視賊所向繞由東北向西南
攔勦聯絡諸軍或犄或角共維大局疏入報聞時各軍

分起援直潘鼎新率所部於正月十九日由東阿渡黃善慶溫德勒克西於二十日渡黃唐仁廉馬勇於二十一日渡黃相繼北發潘鼎新於二十日馳抵德州探聞賊由保定南竄饒陽恐其久踞肆擾或東竄河間天津大局攸關因倍道遄征二十一日過直隸景州二十二日抵阜城卽改由獻縣西境徑趨饒陽鴻章慮鼎軍兵力單弱飛飭善慶溫德勒克西唐仁廉等馬隊速進會合鼎軍兜勦並一面飭催楊鼎勛郭松林等軍陸續北渡鴻章亦卽督隊起程時東軍王心安在饒陽爲賊所挫賊旋陷祁州饒陽獻縣勢張甚適鼎軍追及二十四日敗賊於饒陽城東賊遂竄深州一帶鴻章因建言逆

氛正熾各軍須穩慎進戰前截後勦此擊彼應先得一二勝仗再厚集其勢與之角逐卽可就地殲除若以無制之師單弱之眾輕爲嘗試挫敗旣易賊氛立張也故兵家慎言戰以戰而不必勝不如不戰之養威重矣
二月鴻章督盛軍進駐德州潘鼎新善慶駐守保定郭松林楊鼎勛率師進勦鴻章之自濟甯北渡也本欲俟周盛波一軍北來取齊而行至正月二十日盛軍猶不至乃自帶小隊先行由東阿渡黃各軍造次進援糧臺猶遠在徐州清江後路糧餉軍火轉輸頗難乃議張秋設立轉運局以通南北餉道行過張秋順道至運河口察看形勢飭員籌挑黃運交滙淤阻之處以通舟楫適

周盛波先令弟盛傳率部踵至鴻章遂督之以行二十日抵東昌時雨雪載途泥淖甚深而捻賊由高陽東竄河間陷踞獻縣邊馬擾及交河富莊驛一帶景德均戒嚴鴻章於二月初七日自東昌督隊趲行初十日至德州郭松林楊鼎勛率軍來會謀報賊被官軍由北兜擊初六七日卽竄擾衡水縣境遇滹沱水漲不得渡初八日北竄深州王家井等處鴻章以德州距深州僅二百餘里捻極飄猾趨向無定德景爲

京津要路而德州濱運河轉輸差便遂飭楊鼎勛郭松林整隊由景阜進而自統盛軍駐焉潘鼎新善慶等軍於正月二十九日追賊至保定直督奏派在北路堵遏遂

駐守保定西大汲店鴻章所部北援者郭松林楊鼎勛爲一大枝潘鼎新善慶爲一枝自鼎軍及善慶馬隊扼紮保定而武毅勛字兩軍進勦前敵隨鴻章駐德州者僅盛軍馬步十一營矣東撫丁寶楨親統王心安七營駐防河間楊飛熊八營駐防任邛莫組紳十營出勦而朝廷猶以賊勢將逼津南并

詔李鴻章進防天津河間一帶鴻章以河間一帶既有東軍大枝扼紮賊勢現趨西南河間情形較鬆似不須兩營並紮致多擠雜且賊踪飄忽瞬息百變祇當揀派大枝勁旅敢戰宿將與之隨地兜逐相勢勦辦不能取決於數十百里之外致誤機宜前在山東辦任賴等股只籌選

將練兵不管臨敵調度故諸將皆無所牽制得以放手
勦辦致底成功且擒賊無攻城奪寨伎倆故城寨易防
而平原難防凡城池失陷必其城已倒坍或無壯丁可
守也平原四達只能守城寨城寨之外不能禁大股之
不衝突馬賊之不游駛惟大山大水可以扼之直境四
望寬平除滹沱滏陽衛運各河西淀東淀一帶可以設
守但兵少亦不足濟事此外則有勦法無堵法其言防
言堵者皆有虛聲而無實濟者也必令進防河間天津
應卽調回郭松林楊鼎勛等勿庸進勦帶赴東北妥籌
布扼東軍亦可卽回本境分防德州臨清等處云云
詔仍督鴻章率郭松林等軍迅速前進並著催周盛波等軍北

上以厚兵力

二月十六日郭松林楊鼎勛破賊安平城下鴻章屯景
州時賊盤旋深州衝水之交郭松林楊鼎勛率隊由景
州武邑西進兜勦於十四日會同前敵營務處段喆帶
隊進駐景州龍華鎮謀知賊又由省南下竄安平十五
日我軍由武強小範鎮渡河十六日將抵安平城下忽
見塵沙蔽天賊騎皆從西北來松林等派馬隊迎擊急
調後路步隊策應易用剛吳鳳柱胡連發等進戰小有
擒斬步賊從後突至我軍馬隊不利松林鼎勛亟令李
長樂宋德鴻高占彪唐宏成吳雲集等步隊馳援鏖戰
三時久合軍猛擊斃賊甚眾賊初死拒鼎勛等又派馬

隊抄出賊後張逆腹背受敵遂大敗我軍追殺至三鼓始收隊夜賊乘我軍疲困欲繞道竄逸松林等預防之先派隊四路游徼時大霧迷濛見賊掩旗潛向南遁松林等急督隊追之賊騎四散至饒陽之楊家村賊見追急復回拒我軍環攻之積尸載道賊酋張志清劉琅夏以仁領數百騎乞降餘眾向東南敗走又躡追二十餘里劉松山郭寶昌張曜宋慶程文炳等以師來會松林鼎勛各選精銳四路跟踪兜截又以輜重累墜令軍士裹糧追擊賊見我軍銳進四路兜集十八日折竄饒陽武毅軍又迎擊之賊遁繞回東南由獻縣武邑復踞深州畱楚鎮鴻章謀知賊爲各軍追急武衡一帶虛無一

兵慮敗匪東竄由武衡犯滄青則津郡又警乃令盛傳帶八成隊進紮武强小範口鎮爲郭松林等援應並遮蔽東竄之路而自移屯景州調度諸軍又以湖北宜昌鎮總兵黃中元湘勇兩營兵力極單并歸楊鼎勛統帶而飭黃中元赴任

二月二十三日郭松林等與豫軍勦賊饒陽境襲斬邛德才張五孩等賊大敗二十八日由鉅鹿磁州境內逸走安平之捷賊旣東竄又爲劉松山郭寶昌喜昌程文炳與張曜宋慶等軍四面兜殺走逸無路十九日郭松林楊鼎勛要之於深州時賊爲豫軍所敗向南奔竄復橫折而北將及深州東北李家村與我軍遇騎賊團結

爲十餘陣抗拒鼎勛等以馬隊衝陣而以步軍爲援應賊爲馬隊所衝稍卻松林督李長樂宋德鴻蔡國祥高占彪唐宏成吳雲集等步隊又從旁要擊之賊團陣皆散我軍馬步齊進斃賊千餘生擒數百奪獲騾馬無數張逆率步賊先遁而以騎賊殿我軍乘勝壓追十數里賊騎皆狂奔張曜宋慶軍亦至賊遂東南竄欲由武邑圈頭過河適鴻章先派隊紮堵圈頭橋聯絡民團協守賊偵有備二十日復由深州西竄晉州界二十一日郭松林等馬隊遇賊於范家村擊敗之收降鄧新樂等一百餘騎張曜宋慶馳至晉州西北攔勦賊復折竄東南二十二日竄至武強小範河口欲渡鴻章先派盛軍督本地團勇拆毀河橋賊不能越二十三日折由饒陽逕奔肅甯松林鼎勛及張曜宋慶等急馳百餘里抄出賊前謀知賊踞饒陽東北元城一帶遂與劉松山郭寶昌等軍齊進乘夜兜襲二鼓後行近賊巢向前猛撲村旁散賊駢戮殆盡其大股屯踞村莊疲敝皆卧我軍乘利而入立將邛得才張五孩所踞兩大莊攻毀斬斃無算張總愚另踞一莊糾黨迎拒我軍四路齊進賊亡命狂奔二十四日敗逆由安平竄深澤二十五日竄晉州二十七日辰刻在晉州藁城交界樓上村隄師溝等處偷渡滹沱河松林鼎勛與劉松山張曜宋慶各軍先後追至賊多淹斃馬賊數千人向南竄逸松林鼎勛派馬隊

追之午刻及賊吳鳳柱胡連發等率洋槍隊突擊賊屢卻屢進松林鼎勛復令胡良作湯得上尹長林陸懷邦夏青雲合力兜圍乃大潰我軍乘勝追殺二十餘里調集步隊繼進復追三十餘里直抵趙州境沿途斬獲千餘級奪獲騾馬無數二十八日賊由鉅鹿縣官亭五陳等村向西南磁州一帶逸去

三月初十日鴻章由冀州進駐大名十二日郭松林等截賊於滑縣大伾山破之賊回延津鴻章之駐景州也本以賊蹤盤旋深衡之交恐其竄擾景德乃賊屢經挫衄知東路有備乘隙西走潛渡滹沱河向南疾逸鴻章於三月初二日督隊自景州向冀州前進初四日至冀

州賊竄入豫省之臨漳渡漳水由衛輝新鄉一帶西竄獲嘉修武爲豫軍扼勦復折而東趨原武陽武鴻章以賊已入豫境大名與濮范滑濬毘連可以居中控制藉固

畿疆門戶乃於初十日移駐大名又以賊警在南所部兵力甚單奏請飭催潘鼎新善慶等各隊倍道南下俾資調派

詔如所請賊之南走本以直境官軍四集此截彼追不得喘息恃其騎疾於渡滹沱河後悉力竄擾豫境

朝廷急圖翦滅督促諸統帥蹙之豫境爲一鼓殲擒之計乃賊偵我軍已追出直卽復回竄初十日掠延津而北

漸近直東鴻章恐其乘虛復竄

畿輔飛飭松林鼎勛自彰德赴滑縣攔勦親督師由大名前進乃賊騎飈疾不一日已由滑縣向東北奔竄擾及開州邊境鴻章時抵南榮卽由清豐馳赴開州整軍待之松林等軍於十二日先抵滑縣城西劉松山郭寶昌張曜宋慶均尾賊後松林等慮賊追急入直是夜啣枚疾走折由濬縣境繞出東北橫截之行四十餘里次大伾山天將曙有賊馬千百由東南向北松林親率胡良作馬隊飛騎衝入易用剛吳鳳柱督各營排進賊整隊迎鬪吳鳳柱易用剛躍馬陷陣軍士競踴躍爭先賊陣始動蔡國祥宋德鴻李長樂陳飛熊等步隊并乘勝盪

擊賊大奔忽有悍酋率眾返鬪槍隊攢刺之其眾亦潰鼎勛督隊由大伾山左突出橫截賊且奔且戰胡連發徐邦道合力邀擊高占彪吳雲集督隊策應賊眾逼山而陣皆下馬搏戰以刀矛相擊撥刺有聲時我淮軍中有習大扎刀者奮呼直前一悍酋中刀立斃各兵謹譟賊乃驚逸步隊排放連環槍礮斃賊甚眾松林鼎勛兩軍猛追四十餘里生擒悍酋常虎兒等十餘人并老賊數百名陣斬無算是日鴻章甫抵開州派隊向西南搜捕策應賊遂回竄延津封邱一帶賊之竄延津也本欲由開州走大名東昌以圖北擾不料淮軍追截受創南還時左宗棠由彰德進當正西鴻章自請駐開州以當

東路報可

三月二十日賊由延津東北竄我軍扼之滑縣不利陳振邦受矛傷旋歿賊東竄莘縣東昌由東昌渡運方賊渡滹沱之時僅數千騎竄豫後沿途擄脅黨羽復眾摩邊衛輝延津間欲乘隙北犯郭松林楊鼎勛仍赴滑縣迎勦潘鼎新善慶温德勒克西亦由內黃至滑以滑至長垣地勢平曠騎賊無可攔制建議就衛河以東黃河以西連營排紮先扼竄路再圖進勦正籌布置賊已突至十九日從封邱北趨長垣鼎新率隊攔遏賊乃折竄滑境二十日黎明賊全股來犯鼎勛派徐邦道胡連發以馬隊迎擊擒斬數十名賊忽退數里鼎勛知有異嚴

陣以待不逾時賊果率大股回犯步賊皆矛結數十團陣滾隊而前馬賊翼抄我軍後胡連發奮勇直前矛傷左臂裹創力戰鼎勛復率高占彪吳雲集唐宏成分路策應槍礮周擊吳雲集大呼陷陣手刃悍酋數名賊奪路向東北疾走郭松林分紮長滑之交知賊由滑南竄立率所部往策應鴻章從開州派唐仁廉陳振邦馬隊赴滑協勦亦至遇賊於大河唐仁廉首先衝陣斃賊多名賊騎從兩邊抄下陳振邦繼進復斬悍賊二十餘名賊全股回撲陳振邦鼓勇進戰奪馬三十餘匹賊以悍騎四面包裹陳振邦深入賊中爲賊刺傷咽喉正危急間松林督隊馳至飭宋德鴻陳飛熊李長樂等步隊縱

橫擊刺賊墜馬甚眾易用剛吳鳳柱各縱騎兩旁抄殺賊乃解圍東北竄鼎新善慶等旋自長垣追至與松林鼎勛會合痛追同抵濬縣賊由濬縣內黃交界圖渡衛河二十一日鼎新善慶等擊走之鴻章復飭周盛傳吳長慶等由開州襲勦二十二日我軍行抵內黃之七級見賊由西南向東北馳走卽率隊攔擊賊騎猛撲我軍步隊擁進炸礮火箭連環轟擊賊敗馬隊乘勢抄擊賊仍向東路竄去生擒賊目許善王坤杜秋等十數名賊沿河竄向內黃鼎新善慶溫德勒克西追過城北二十餘里時賊循衛河北竄而善慶溫德勒克西馬隊緊躡於後乃由內黃五龍口偷渡馬隊進遏之賊見步軍尙

遠揮馬賊數十團悉力迎拒並分數股繞出陣後層密包裹愈戰愈緊善慶等各率部分拒頗有斬獲鼎新松林督馬馳援而令武毅勛鼎各步隊接應善慶溫德勒克西知有援軍從圍中突出賊腹背受敵大敗降其僞將熊大海騎賊百餘人賊復趨東北二十三日犯南樂清豐之交周盛傳吳長慶督隊追及陶保村外擊斃馬賊數十名追二十餘里至南樂縣遇賊大隊回撲周盛傳率馬隊迎勦賊騎萬餘沖壓周盛傳將馬隊撤依步隊進戰賊見我軍馬步齊至悍賊數千下馬持矛蜂擁死鬪營官賈起勝衛汝貴汪炳炎葉志超楊岐珍馬朝選奮勇迎擊馬朝選受矛傷數處宋冠軍復帶開花劈

山礮連環轟擊麇戰兩時之久賊潰走我軍乘勝掩殺屍橫溝渠皆滿計斃悍賊千餘名當酣戰時賊分二十餘騎抄吳長慶各營後黃仕林者貴分擊走之又斃賊目張丑等數十名賊星夜奔山東莘縣境內鼎新松林鼎勛恐賊乘隙渡衛遂循河窮追二十五日賊奔東昌時滄州下窪高家口梟匪高岩糾集鹽馬賊數千人投賊入夥引賊前股由東昌城南李海務渡運東趨我軍追及之郭松林善慶溫德勒克西等縱騎疾擊賊率悍黨逆戰易用剛吳鳳柱排隊進壓賊用結團滾隊法冲陣我軍不動徐邦道吳連發吉玉成各率馬隊潛從旁截之賊之團陣漸散我軍步隊排盪入陣擒悍酋何士

嘉周久等數名斃老捻數百賊復奔潰時賊雖屢敗而掠馬甚眾步賊悉改爲騎日馳百數十里我軍躡追常若不及兼之兵賊出入之地無糧可糴是以軍中斷炊至有數十日以瓜豆野蔬充腹者

四月初六日鴻章自開州至於東昌建防守黃運蹙賊海東之議時秦督左宗棠率劉松山張曜宋慶程文炳之師由德州進景州鴻章慮各軍急追賊折回南擾致我軍奔命不遑復落賊後乃緘商皖撫英翰請督皖軍進駐臨清豫籌防扼旋

諭旨以定安等兵力單薄飭李鴻章迅督諸軍赴吳橋一帶扼要駐紮以爲前敵諸軍調度鴻章因疏陳曰目下賊勢

駸駸北走臣雖派大枝勁旅尅期前驅心繫
京畿憂惶莫釋惟有遵

旨遄行不遑顧及後路拜摺後卽督同周盛波吳長慶等營由
東昌起程馳赴德州吳橋等處扼紮就近相機調度冀
補萬一臣察捻逆久成流寇張總愚尤極狡猾頻年竄
擾北地擄馬最多平原曠野瞬息百里我軍步隊與爲
躡追實若不及近來軍行日至百餘里爲用兵十數年
來之變格然軍士如此奮勉猶不能迅圖殄滅非力不
能敵蓋勢不足制之也窮年累月飢走疲憊徒勞我師
誠恐一旦潰蹶難支轉生意外之變臣不得已屢爲就
地圈制之請迭商左宗棠等擬設長圍以困之無如黃

河以北平坦千里網羅難施由於地勢使然懷慶形勢
最險賊竟不肯深入張逆鑒於任賴等股之覆轍一聞
圍紮卽死力衝突亦不容我閒暇次第施工議者謂
就運河一綫設防蹙之海東一隅較得地勢惟運河自
天津至張秋黃河口計一千二百里內張秋至臨清二
百四十里年年黃水倒灌淤成平陸尤費兵力約須十
餘萬人方可分布現計直東豫主客各軍僅及十萬臣
慮其有守無戰潰決爲患左宗棠慮局勢疏廓難於有
成皆係實情或又謂待賊回竄豫境分守漳衛河及張
秋臨清運堤以蹙之費兵亦近十萬又恐偪賊入晉總
之圍局不得猝成賊騎難禁紛竄卽嚴督諸軍日以追

勦爲事能勝賊而未足以滅賊久且有疲師覆軍之憂
可勝惴惴疏入

詔仍促鴻章赴北路并皖豫各軍統歸調度鴻章冒雨督隊而
進十二日至德州時郭松林楊鼎勛潘鼎新善慶諸軍
之追賊者由東境轉戰入直前月二十八日諜報由荏
平西北竄賊騎數十團隱伏樹林間松林先督王平西
蔡國祥宋德鴻李長樂等步隊進擊賊馬退列林外鼎
新督戴春林吳從發潘國揚各營鼎勛督高占彪吳雲
集唐宏成各營從兩旁合抄松林復調馬隊與善慶溫
德勒克西繼步隊接戰時步軍已挫賊鋒馬軍銳氣益
奮往來馳擊賊陣動旋遁我軍馬步力追三十餘里至

高唐州雲家村生擒賊目賈記張有德老捻數十陣斬
悍黨頗眾賊倉皇北竄我軍復及之徒駭河邊奪馬尤
夥二十九日追過平原賊趨陵縣吳橋夜各軍冒雨進
追行未三十里與賊值善慶溫德勒克西唐仁廉及武
毅鼎勛各馬隊奮而前騎賊挺矛回鬪都司邸得功陷
陣死之步軍各營急前策應塵戰逾時賊棄陣而北時
賊欲循吳橋就安陵連鎮兩處竄渡運河松林等以運
防未定各率所部夤夜驚抵吳橋賊聞我軍踵至迤東
逸走四月初一日大雨諜知賊仍欲由東光偷渡運河
各軍循河急追午後及之賊復折回余家莊初二日賊
從東光境內突犯運濱我軍攔擊賊敗竄南皮賊酋鄧

保正率三百餘騎來降初三日鼎新與各軍議以賊北竄非繞前截擊不能遏之使南乃循運河東岸徑指滄州適賊已至阻雨城南東軍王心安落後遇賊求救我軍迎賊設陣分四起合擊鼎新鼎勛兩軍先從左右兩路進松林督所部應援善慶溫德勒克西唐仁廉直搗中堅賊騎縱橫數十團整陣相拒松林令馬隊誘之使近賊果來撲我軍環槍排擊之步隊執長矛譟而進賊傷皆墜馬退復陣鼎勛兩軍乘勝壓之乃大潰奪路東走夜賊由東而北我軍追及於滄州之花園襲奪賊館數處收降張懷慶胡志等數百人初四日賊竄靜海追軍至陳官屯鼎勛乘夜襲擊賊目何祿誠等率七百餘

騎來降初五日賊竄近天津松林等馳前攔截晚抵天津分紮城外探知賊在楊柳青伐木結箒鼎新令張景春戴春林會善慶溫德勒克西馳擊之賊又敗退賊以天津爲

畿省富區窺伺久自淮軍北來日夕爭逐未得乘勢肆其吞噬於是竄豫以制淮軍南下然後疾捲回犯津沽冀淮軍不及援而後可以得志詎知淮軍冒雨忍饑與之並趨而北抗鬪不勝逆謀不遂而逆勢亦沮鴻章於德州上戰狀

是月鴻章具疏力主防運之議潘鼎新郭松林建守減河以爲滄青靜海屏蔽十九日防運分汎議成先自黃

河銅瓦廂之決由直隸東明長垣境內直趨大清河牡
蠣嘴入海其午貫運河之地則曰張秋鎮所謂黃運交
滙也前東捻在黃河之南扼之河北運西以蹙之於海
卒底大功今西捻在河北非嚴扼張秋不能合圍而張
秋至臨清運河二百四十餘里年年爲黃水倒灌淤成
平陸非引黃入運則運河無水鴻章之北渡也於張秋
鎮設立後路轉運局飭水師統帶提督徐道奎樹字營
統帶張樹屏轉運局委員知府萬年清挑濬淤沙引黃
入運至是捻賊皆竄運東遂力主防運之議以爲直東
交界之地縱橫七八百里賊騎飄忽無從圈制欲趁東
海 形勢聚賊殲旃必須先扼西北運河聯築長牆

方可絕其出路尤以東至津沽西至東昌張秋爲兩路
鎖鑰而伏秋大汎未至黃水僅高尺餘未便啟壩旣不
能以水爲險則設防全恃兵力乃馳檄各統將相度地
形妥籌萬全之法時賊自天津爲我軍扼截十一日由
鹽山慶雲東南竄海豐一帶十二日至武定十三日至
商河十五日由禹城茌平回竄高唐境潘鼎新郭松林
自天津追賊南下過滄州滄州南有捷地壩者在運河
東岸當減河口以時啟閉黃泄濟運者也減河自捷地
壩至海濱牧猪港百餘里橫亘東西水漲足限賊騎竄
津之路時漳衛上游山水暴發運河陡長至一丈五六
尺鼎新松林見運水盛漲卽督軍士開捷地壩導運入

減並飭地方官就河北集練築牆以爲滄青靜海屏蔽
鴻章卽檄鼎新鼎勛駐減河防守而令松林由德州赴
東昌相機嚴扼未幾潘鼎新楊鼎勛築減河長牆八十
餘里告成減河水深丈餘鼎新等兩軍扼守甚嚴自是
天津無犬吠之警於是東皖淮軍議分運防汛地十九
日議定自東昌城南至壽張河口淮軍郭松林吳長慶
兩軍守之自東昌以北至臨清東皖各營分守之均尅
期築牆扼紮直隸境內運防則直軍等各任其責時徐
道奎等挑濬張秋運河適竣而黃水大至道奎等開壩
引黃入運鴻章又調楚軍丁長春水師由張秋臨清駛
入德州運河圈制之策於是乎成初劉銘傳之以病乞

假也請期三月是時期滿

詔鴻章飭催迅赴北路勦賊鴻章因覆奏曰劉銘傳與臣生同
鄉里少負不羈之材血性忠勇智畧明達近時武將中
實所罕見蘇省肅清非臣之功劉銘傳與程學啟之功
爲多任賴捻股蔓延數省幸而殄滅亦非臣之功劉銘
傳一人之功也追逐三年疲憊實甚迨東捻全股撲滅
劉銘傳乞退更切其時適西捻出竄將及河朔迭奉
諭旨令該提督統兵協勦該提督久勞致病骸腫不能乘騎係
屬實情臣不敢遽爲代請開缺但請假三月俾得靜以
調養並將所部銘軍委該軍營務處道員丁壽昌暫行
代理駐防邳州認真操練以待劉銘傳假滿視師三月

間臣因捻勢披猖已兩次手書諄催來營襄助現聞督臣曾國藩亦爲懇切函催茲迭奉

恩諭又經恭錄檄行惟恐驛遞梗阻該提督或藉病遷延致誤師期現在營中生擒賊黨皆供稱張逆惟恐劉銘傳復出時時探問微臣文弱辦賊之才自愧弗如可否仰蒙恩旨令劉銘傳總統前敵馬步各軍飛飭兩江督臣曾國藩署安徽撫臣吳坤修就近催令迅速統軍北上與臣等共籌滅賊之方該提督通習書史素明大義諒無不急難赴公也

詔皆如鴻章請

閏四月初一日鴻章回德州飭周盛波帶銘營先鋒馬

續修廬州府志

卷九十九

平捻紀畧下

三十五

隊周盛傳帶盛軍步隊由德州赴陵縣截勦初三日兩軍至陵縣東夜見賊火遂催兵東進行三十里至鳳凰店遇賊馬往來游駛其大股尙在五里以外我軍馬步結陣齊進直搗中堅賊眾突見官軍不戰而潰馬隊躡之斬賊百餘名獲馬六十餘匹奪回賊踞村莊二十餘處追至何家莊張逆突驅騎賊大股結十餘團陣回撲我軍迎擊復向東路絕鞞而奔零騎分路折竄又遇劉松山張曜宋慶程文炳各軍紛紛散走由東北驚正東軍中諜言張逆知圍已合力不支黨眾離散欲死中求生引官軍至海隅疾竄西北撲運搶渡盛波盛傳知其語信乃改由甯津向吳橋西南截擊兼爲德州屏蔽初

六日賊過海豐東北四十餘里果折而西行沿途逆黨紛紛出降初七日賊酋高老步韓錦生率四百餘人降劉松山周老鳳率七十餘人降張曜張逆下令諸賊各帶門板繩索向東光下口一帶搶撲運河適鴻章先派楚軍水師總兵丁長春赴下游巡防是口礮船駛抵下口日方午陸軍亦躡追而至賊正運木板赴河紮筏水陸各軍分路奪擊賊狂奔繞東光城而走有騎賊數十竄至馬頭河邊水師復擊散之向南奔竄又於連鎮一帶窺伺鴻章調提督徐道奎水師由德州亦至連鎮賊知有備初九日繞由吳橋德州界內南走陵縣盛波盛傳驚追之申刻及賊尾隊於陵縣西二十里之士橋賊

以精騎二三千回拒盛波督馬隊與搏戰適步隊亦至合力併擊賊大奔潰擒殺百餘人奪獲馬數百匹賊竄平原在平高唐境內盛波等乘勝逐勦

五月十三日潘鼎新破賊於臨邑鴻章令諸軍進扼馬頰河蹙賊使不得騁初運河減河之守賊騎已有限制然運東地勢平曠縱橫七百里我軍步隊躡追不能速進馬隊又少於賊騎乘暑追逐軍中疫病繁興五月初四五日鴻章乃飭郭松林潘鼎新等暫駐陵縣臨邑一帶居中防扼賊由武定陽信海豐等處北竄劉松山郭運昌喜昌由鹽山迎勦張曜宋慶春壽由樂陵截擊賊馳走無路於十三日晚至臨邑城東北十餘里各村踞

宿鼎新聞報乘夜掩襲之賊日夜狂奔疲乏皆入村酣臥夜二鼓我軍潛搗其巢遂將卞家廟各村踞賊悍酋張宗先一股駢戮淨盡奪獲騾馬六百餘匹生擒數千百名鴻章以運東平曠扼守各河雖能制賊而難得其死命且久晴河涸西岸民團協守未可深恃鋌而走險防不勝防議欲趁黃水盛漲縮地圈紮以運防爲外圈而就恩縣夏津高唐之馬頰河截長補短劃爲裏圈偪賊之計乃請東撫檄飭恩夏清平各屬官紳號召民團就馬頰西北岸聯紮長牆又飭郭松林潘鼎新周盛波等督率弁勇由臨邑陵縣築牆挑濠與馬頰河民牆相接

五月二十五日郭松林敗賊於海豐二十七日賊竄吳橋犯周盛波盛傳之軍盛波等設伏狙擊大破之又掩之於陽丁莊斬張逆姪張三彪松林等之紮馬頰河也由臨邑陵縣聯紮牆壕至恩縣德州境內與馬頰河民牆相接而留臨邑南至濟陽黃河濱將及百里誘賊回竄西南一隅再行就地圈紮賊狡數多揣知有異甫竄濟陽十五日卽由濟陽折趨東北賊情飄忽前敵諸軍不能扼鴻章慮賊竄出長牆時候補鴻臚寺少卿袁保恆奉

旨交鴻章差遣鴻章檄充馬步全軍翼長令馳赴前敵相機籌辦鼎新盛波等所紮牆壕工已蒞酌留隊伍於長牆適

中處立老營坐守而選精銳馬步進勦盛波盛傳並帶八成行隊進駐吳橋甯津交界以備賊回運河二十四日賊由海豐南竄濱州爲張曜軍所敗由陽信復回海豐郭松林帶隊行抵樂陵副都統春壽亦率馬隊來會二十五日辰刻及賊於海豐之郝家寨春壽先以騎兵嘗之賊四面圍裹春壽軍不能敵松林飛飭馬步隊馳援分兵爲三路唐仁廉宋德鴻由右進胡良作李長樂蔡國祥由左進松林自率親兵與楊西平步隊由中路進賊見淮軍四集勢已沮我軍三路並進截賊分數處春壽亦破圍出賊腹背受敵紛紛敗逃各軍分隊追擊忽雷雨大作收軍駐慶雲之余家店是日春壽馬隊頗

有傷亡顧亦擒悍賊數百名松林一軍生擒著名賊酋周老廣兄弟及大小賊目數十名賊黨八百餘名陣斬千餘級奪獲騾馬二千餘匹旗幟矛械無算二十六日松林督軍急進馳四十里許賊憩村落中見兵至驚走逐北三十里賊急反戈列陣以待松林整隊碾壓賊復驚遁我軍乘勢掩殺斃老捻六十餘名生擒五十餘名獲騾馬百餘匹賊大創奪路急奔二十七日由樂陵繞出甯津吳橋間折向西南急馳百五十里由吳橋之范屯鉤店突犯盛軍駐營之毛家莊一帶盛波偵賊至令步隊伏密箐中以馬隊分三路箕張誘賊盛波率步隊亦分數起伏馬隊分左右賊初避勦奪路急奔不虞反

入我腹地賊騎猶兩萬餘奮鬪盛波斂軍避其銳揮馬隊少退以示弱賊果猛進我軍馬隊皆下騎麀戰步隊伏軍四起槍礮雷發斃人馬無數賊潰四散縱橫十餘里凡賊可竄之路我軍皆已扼紮圍而蹙之二鼓後敗賊散不能合一股向東回竄一股繞由陵德交界劉家莊向西南竄踞離德州七十里之楊丁莊一帶盛傳窮追不捨夜三鼓逕襲之盛波率馬隊爲援應馳二十餘里逕抵賊巢盛傳親帶小隊潛赴各莊偵察時賊乏甚露宿林下楊丁莊賊尤多乃密令各營分四面進圍合然後鳴槍礮呼譟賊夢中驚起亂竄爲刀斫矛刺及自相蹂踐死者十有五六陣斬張逆之姪張三彪生擒股截殺或爲巡兵邏禽自此賊勢益不支

六月初七日郭松林潘鼎新敗賊於沙河捻首張總愚受重傷而遁張逆因陳臨添築長牆竄地日蹙盤旋海豐慶雲之交爲各軍所追日夕無停趾五月二十八日折竄德平潘鼎新合善慶溫德勒克西馬隊追至抄前攔擊日加午賊從西北來初勢甚銳我軍馬步分迎之賊被槍傷者甚眾俄敗走解家店奎台一帶我軍追殺數十里二十九日賊竄商河之李家坊松林一軍追及

之時賊屢挫勢蹙然所餘盡張逆死黨兇悍老賊無不善騎習戰松林深知其狀豫伏兵於秫叢中以親兵馬隊誘之賊果回騎相撲伏起截殺百餘級餘眾狂奔惠民一帶軍士乘夜追襲行三十里許賊踞村莊眠息松林令李長樂蔡國祥襲其左宋德鴻率右後兩營襲其右松林自督楊平西及唐仁廉胡良作馬隊爲後路援應三鼓賊困臥無警備各軍挺刃而前遇賊卽斫賊整隊不及四散潰走立奪所踞村莊十餘處衝賊爲二一竄正北一竄東北松林於晨炊後卽督仁毅軍向正北追勦七八十里抵樂陵劉村沿途截殺生擒悍賊千餘名奪騾馬三千餘匹收幼孩及解散脅從甚夥李長樂

生擒張總愚之姪張七張正江之弟張得華卽於陣前正法其竄東北一股值張曜宋慶督隊由樂陵東進松林仍督隊追進六月初三日追至楊信清豐鎮賊收散亡甫屯集聞我軍至奔而南初四日由武定杜家橋竄過徒駭河松林過河躡追賊竄濱州李子鎮時各鄉村鎮均設立堡寨守望相助然第能自守無敢擊賊者賊過李子鎮鎮民放炮擊之賊怒攻寨俄頃松林率兵追至賊遙見旗幟皇遽棄寨走追斬獲數百名賊竄西北我軍追至夏家橋潘鼎新亦由陽信追至初五日合軍進勦已刻及賊於馬店迤南賊窘迫回拒鼎軍馬隊勝嗣武率三營迎擊步隊吳從發潘國揚張景春繼之松

林督唐仁廉胡良作馬隊從左路抄賊後李長樂宋德鴻蔡國祥步隊繼之首尾夾擊賊初聯數十騎爲一團陣人背倚馬尾接共數十百團陣與我軍相抗我軍深入破其數十團餘駭散因大奔潰拋棄騾馬婦女器械以綴我軍松林鼎新嚴戒軍士不得回顧疾追四十里至商河東北于家圩盛暑炎蒸人馬困乏暫就樹林憩息賊乘間回撲胡良作馬隊大呼奮擊之生擒悍逆百餘名各軍乘勢合進又斃賊千餘暮收隊賊目陳信元乘夜率騎來降鼎新撫之初六日大雨竟日駐軍房家寨賊踞沙河左近初七日黎明雨未止松林與鼎新乘雨潛師襲賊鼓軍士列陣而進行十餘里過沙河賊方

起隊欲走見我軍突至大驚松林截其前鼎新襲其後泥淖載塗賊騎不能騁亡命死拒我軍馬隊連環迭進無不一當百鎗丸如雨而下呼聲雷動賊大勦我軍乘勢壓追直抵商河城下自沙河至商河三十里沿途伏屍相接當戰酣時張逆總愚親率黑旗隊衝陣中鎗落馬數十騎翼之而逃羣賊因之紛潰其大股脫逃者尙五千餘騎翼長袁保恆至臨邑亦派馬隊於沿途擊擒數十人張逆表姪張三老鳳陣斃焉松林所部馬隊統領記名提督胡良作鼎新所部步隊統領記名提督潘國揚均受重傷賊敗遁濟陽東北黃河之鄆家渡龍王廟一帶時大雨連旬六月初一日以後黃河伏汛陡長

長江水師提督黃翼升淮陽總兵歐陽利見漕標記名提督姚廣武各督炮船由張秋乘漲進口初十一等日駛入德州運河北路運防得此水師勁兵防務益固而徒駭等河水勢日盛濟陽一帶平地水深二三尺賊擇地形稍高者踞之鴻章嚴檄諸軍乘水進攻翼長袁保恆與郭松林潘鼎新吳長慶會合豫東皖各軍由徒駭河北岸鳧渡而前蹙之水濱爲一鼓聚殲之計於是劉銘傳自皖籍來德州鴻章檄令統帶原部銘軍馬步隊馳赴前敵相機督戰當

詔催銘傳之赴軍前也銘傳正患腿瘡大發寸步難移嗣調治稍痊於五月十六日自皖力疾就道六月初八日行抵

續修廬州府志

卷九十九

平捻紀畧下

四十一

東昌老營聞我軍屢獲大捷賊勢窮蹙旋謁鴻章德州力辭出勦不敢取巧攘功鴻章宣

朝旨慰勉檄令迅赴前敵會合各軍以作士氣檄行復奏陳焉六月十二日潘鼎新逼賊於老海窪及玉林鎮福隆寺擒斬僞將何光俊等十五日張逆突至德州高家渡鳧水搶渡運河水師徐道奎等奮擊不得渡回竄德平張逆自商河之敗遁踞濟陽以北三十里之鄆渡曲星集一帶其地處黃家河徒駭河間時河水漲發潘鼎新與豫軍傍賊之西繞赴東北迎擊之十一日行抵郭橋柳橋時夜二鼓忽賈橋徒駭河西烟火大作賊正由東北蔓延而西我軍卽過河迎勦賊踞民莊肆掠見兵至卽

棄走我軍從而截之斬其尾賊二百餘賊連夜北奔十
二日黎明擾及崔寨馬莊一帶我軍要之平地水皆過
膝騎賊無可施逞復擒斬悍黨三百人獲賊酋鄭文起
賊折向南遁入黃河沿老海窪鳧水向正東狂奔我軍
亦鳧水進追鼎新親督馬步隊從窪西進分兵一從窪
南進一從王盤向東進張逆竄過老海窪卽循河向東
北走值王盤路兵賊下馬捨死盪陣酣戰半時許忽自
驚亂我軍乘勢壓之賊逕投玉林鎮鴻福寺其地在黃
河灣曲處四面皆水坑鼎新率隊伍冒鎗子而前賊眾
墜水坑者一時皆滿張逆率死黨數十人踐屍渡水逸
復收合殘眾沿途擄脅又數千人循徒駭河西南竄適

郭松林帶隊與東軍皖軍由多石橋進五鼓我軍馬隊
先與賊遇賊見兵卽避松林軍向東北截之賊向西逸
竄擒尾賊二百餘名我軍躡賊而西至十四日辰刻過
多石橋西二十里許賊復折而北由王莊搶渡徒駭我
軍追至河濱截其馬賊數十名賊奔臨邑東南時周盛
傳吳長慶兩軍由德州吳橋南下暫駐臨邑十五日盛
傳長慶偵賊北來卽冒雨出隊橫抵德平交界之美鎮
賊正憩民村長慶設伏於林而以輕騎致師賊全股來
撲旣進遇伏乃奔葉志超楊岐珍橫要之擒賊目張正
土石光鑾賊連夜越走德平甯津之交竄繞吳橋至德
州桑園吳長慶有二成隊駐桑園防守運河賊將至桑

園六七里畱防之兵猛出攔截賊不知我軍虛實折向北圖竄運河張逆率騎賊二十餘名至高家渡口冒充官兵喚渡爲西岸守牆民團及水師統帶提督徐道奎戈船勇丁識破開炮轟擊賊大隊踵至撲水鳧渡時運河水陡長一丈五六尺戈船得旋轉施逞民團亦轟擊不絕斃賊眾及馬均百餘奪馬二百餘匹賊不得渡長慶隊伍踵至賊遂往德州北第二屯老君堂一帶搶渡亦爲炮船民團擊潰鴻章在德州聞報飛派總兵歐陽利見鄧萬林各率炮船下駛援應並檄直隸臬司張樹聲道員李逢春飛調景州民團全隊上牆堵擊又飭親兵小隊道員周世臣總兵張樹屏由德州馳勦劉銘傳

帶銘軍馬隊乘夜進師周盛傳軍躡追亦至奪賊踞村莊數處賊知大軍環集而運防民團炮船嚴扼不可犯張逆死黨渙散幾二千人十六日張逆以黨羽殆盡所存僅宗族張正江張宗道張宗先等當撲運之時相率策馬下河而一爲民團水師鎗礮轟擊皆畏沮不從知大勢已去人心已離於是下馬投水爲張宗道救出遂挾張逆乘夜向德平一帶竄去方直境被賊之初鴻章首倡堅壁清野之議奉

詔行之直隸臬司今江蘇巡撫張樹聲故出鴻章部統領樹軍者也躬親勸督各鄉設團築寨爲守望計張樹聲故習兵事且天性慈和遇鄉愚之不樂從者諄諄開導不憚

煩數直民無智愚皆爲感動修築堡寨一律完固遇警咸持械晝夜登陴凡修牆浚濠之事得張樹聲一檄婦子皆荷畚鍤恐後當時民爲之諺曰黃龍千里楊柳一色我有牆堡無虞羣賊誰其使之張公司臬蓋以長牆爲黃龍列幟如楊柳云

六月二十八日諸軍敗賊於荏平逆首張總愚溺水死西捻全股蕩平先是張逆自十五日撲運未成乃由德平陵縣境內逃竄沿途爲周盛波吳長慶郭松林袁保恆各軍追敗於韋家寨林古莊德平義渡口先後降其賊目王有志等及騎兵七八百人張逆所部頭目大半降僅存張宗先張宗道兄弟數人率殘卒千餘人相隨

時黃水盛漲灌入運河德州東光南皮境內東岸沖塌缺口三處運水分由平地漫溢入海賊踞高岡騎不得逞四圍皆水竄走之地日狹張逆知事急乃於十九日趨商河樂陵之交二十日擾及鹽山之保和寨均爲湘軍截殺二十一日折由德平南竄郭松林潘鼎新等軍追至是夜松林馬隊夏青雲潛襲其踞館賊急遁松林督軍窮追二十二日黎明抵盧寨及之擒斬數十人又追三十餘里逆酋羅六率三百餘騎來降松林納之仍追過德平西南十五里賊疲極折走東南踞民莊屯息松林與善慶溫德勒克西馬隊分東西兩路要擊畱鼎軍步隊設伏待之馬隊衝入賊亦整隊分兩路出拒我

軍奮甚賊將退走鼎軍步隊由林叢中陡起擊之賊首尾不相顧擒斬合數百人餘逆向商河狂逸二十三日由商河西南竄二十四日過平原犯高唐二十五日潘鼎新冒雨馳百三十里追至高唐偵賊已向博平清平一帶撲犯運防時東昌臨清張秋間河水深及丈餘馬頰河爲黃水灌入亦盈堤拍岸賊不能越鴻章檄劉銘傳帶馬步軍於二十二日馳勦與松林之師會於陵縣二十六日再會於高唐賊偵知劉銘傳已帶隊出其老營防守李海務一帶力必單是夜初鼓驟犯李海務周家店等處河牆道員丁壽昌趙宗道提督劉克仁總兵劉朝幹等守陴不動俟賊衝至外濠鎗炮齊舉開花礮

彈擊入賊叢賊大創退踞河東村莊壽昌復派提督劉盛瑞總兵丁達材帶隊夜襲賊館擒斬甚夥賊改趨西南四鼓後猛撲七級以北河牆鳧水競渡劉克仁督軍轟擊趙宗道率隊策應賊復敗遁二十七日鼎新率師由東昌迎擊黎明過陳家口十餘里賊竄運不遂欲趨東北爲避兵之計午後鼎新及之於沙河賊回拒我軍壓迫之逆股敗退至茌平廣平境諸軍恐賊東竄得延喘息遂圍賊於徙駭黃運之間銘傳 隊由桃橋守至南鎮松林步隊由桃橋守至博平袁保恒往博平約張曜宋慶之師由博平守至東昌圍旣合各發馬隊於圍中交午逐之二十八日早賊東向回竄鼎軍與豫軍由

在平西南兜逐張逆率死黨豨突首遇銘傳督馬步大隊截殺賊繞避疾走復值松林東來之師而河汊紛歧水溜泥陷奔走無路銘傳松林兩軍馬隊合五六千人縱橫擊逐遂將賊黨悉數誅馘生擒張逆子張葵兒其兄宗道弟宗先姪正江僞帶隊頭目程四老坎馬老三樊大等皆斬於陣前張逆率騎潛逃至徒駭河濱下馬投水死西捻蕩平由驛六百里馳上捷狀

詔先開復李鴻章前降革處分並

賞還雙眼花翎黃馬褂騎都尉世職飭各軍搜捕餘匪鴻章得旨分遣各軍馬步四出搜勦附近州縣村莊其先後降賊旋奉密諭察看屢次反覆桀驁不馴者分派弁兵隔別正法裹脅之

續修廬州府志

卷九十九

平捻紀畧下

四十七

眾給護照川資交地方官遞解回籍安撫鴻章分別具疏馳覆奉

上諭本日據李鴻章由六百里加緊馳奏勦辦捻匪全股蕩平地方一律肅清並查明逆捻渠首張總愚投水淹斃一摺覽奏之餘實深嘉悅捻逆自倡亂以來東南竄擾十有餘年蹂躪數省生民受其荼毒不可勝計神人共憤罪惡貫盈上年特派李鴻章爲欽差大臣勦除捻首任柱賴汶洸等股匪詎料本年夏月間逆首張總愚復糾合匪眾肆擾山西河南直隸等省窺伺近畿經官文英翰丁寶楨李鶴年督兵防勦並經左宗棠統軍追擊朝廷復調李鴻章赴直隸一帶督勦以收眾志成城之效現經李鴻章會同各軍督率各將領蕩平

擒逆並將餘匪搜捕淨盡具見該大臣督撫等協力同心膚
攻克奏前已賞還李鴻章雙眼花翎騎都尉世職黃馬褂並
開復處分及左宗棠降革處分均予開復自應分別再沛恩
施以昭懋賞李鴻章著賞加太子太保銜並以湖廣總督協
辦大學士左宗棠著賞加太子太保銜丁寶楨英翰均賞加
太子少保銜李鶴年著賞戴花翎並皆照一等軍功議敘崇
厚當擒逆攻撲天津時督率兵勇紳團力守郡城並籌濟各
營糧餉源源不絕實屬著有勞績崇厚著賞加太子少保銜
頭品頂戴並賞戴雙眼花翎曾國藩籌辦淮軍後路糧餉軍
火俾李鴻章克竟全功著交部從優議敘署直隸總督大學
士官文前在湖廣總督任內暨本年擒匪竄直時均因會勦
酬庸用彰慶賞至意復

詔敘諸將平賊功提督劉銘傳由三等輕車都尉晉一等男郭
松林由騎都尉晉一等輕車都尉布政使潘鼎新給雲
騎尉世職總兵周盛傳吳長慶駱國忠劉克仁楊西平
滕嗣武吳從發張景春潘國揚徐道奎均

賞穿黃馬褂並

賞潘鼎新瑚松額巴圖魯提督唐定奎呼敦巴圖魯劉盛休法
克精巴圖魯馮汝霖騎車博巴圖魯劉盛瑞斐凌阿巴
圖魯徐邦道鏗僧額巴圖魯周志本綳僧額巴圖魯魏

興發阿克敦巴圖魯總兵周盛波法福齡阿巴圖魯李
長樂博奇巴圖魯宋德鴻綳武巴圖魯蔡國祥西林巴
圖魯王平西剛安巴圖魯戴春林達春巴圖魯張賢貴
哈西巴巴圖魯馮作霖愛星阿巴圖魯梁永福額騰依
巴圖魯蔡家旺額爾德木巴圖魯陳本榮霍欽巴圖魯
朱大珍吉勒通阿巴圖魯張樹屏額騰額巴圖魯副將
周瑞龍達桑阿巴圖魯總兵許保清冠勇巴圖魯魏林
起利勇巴圖魯林得成饒勇巴圖魯蕭良貴幹勇巴圖
魯蔣傳盛果勇巴圖魯殷錫茂達勇巴圖魯吳尙霖堅
勇巴圖魯竇如田強勇巴圖魯趙延訓摯勇巴圖魯趙
孟坤赫勇巴圖魯朱先民綽勇巴圖魯馬朝選鋒勇巴

圖魯毛明詩資勇巴圖魯倪祥福銳勇巴圖魯洪福勝
佃勇巴圖魯姚靖戎侃勇巴圖魯潘永勝拔勇巴圖魯
知府萬國順勤勇巴圖魯吳秉權績勇巴圖魯知州鄒
增翰揆勇巴圖魯同知鮑灼略勇巴圖魯副將張兆海
壯勇巴圖魯潘國英盛勇巴圖魯楊春發雄勇巴圖魯
梅東益著勇巴圖魯吉玉成尙勇巴圖魯謝宗福勉勇
巴圖魯叅將王春臺協勇巴圖魯譚燮和勁勇巴圖魯
李大倉綏勇巴圖魯羅建山豪勇巴圖魯錢永林卓勇
巴圖魯游擊王鳳彩勳勇巴圖魯鄧宗仁勝勇巴圖魯
守備鄧長安糾勇巴圖魯胡達發鼓勇巴圖魯千總夏
青雲烈勇巴圖魯馮汝霖徐邦道周志本丁達材劉朝

幹梁善明吳鳳柱均給正一品封典王保勝張佩芝湯得上給一品封典張樹屏丁達材劉朝幹梁善明吳鳳柱並擢提督梁永福蔡家旺陳本榮張士元丁汝昌張發祥楊玉書劉世幹並加提督銜總兵藺福升給二品封典許保清並以總兵提奏副將呂嘉加總兵銜道員丁壽昌劉盛藻以按察使遇缺題奏楊宗濂遇湖北道員缺出請

旨簡放趙宗道加布政使銜甘肅升用知府余思樞擢道員加按察使銜叅將吳世泰譚燮和李大倉羅建山錢永林蘇彬均擢副將游擊陸懷邦加副將銜王鳳彩鄧宗仁擢叅將同知直隸州知州梁承祖加鹽運使銜守備鄧

續修廬州府志

卷九十九

平捻紀畧下

五十

長安胡達發擢游擊蕭萬有千總夏青雲擢都司加游擊銜教諭郭道清擢知縣其餘將士及在事員弁各獎敘有差

七月太子太保銜協辦大學士湖廣總督李鴻章具疏奏陳河神效順請頒

御書匾額以答神庥又奏勦捻以來存歿諸臣忘身殉國各事蹟請加

恩以作士氣又遵

旨覆陳善後遣撤各軍事宜是月淮軍分起凱撤南歸長江提督黃翼升統帶水師由運河分起回南劉銘傳郭松林等統帶陸師由張秋渡河遵

旨於張秋濟甯徐州周家口等處暫紮鎮扼俟籌補欠餉酌量
裁併惟善慶溫德勒克西馬隊奉調回

京暫紮

南苑王萬釗接統之勛軍爲侍郎崇厚奏留天津其餘水
陸大軍均於七月十六日後陸續啟行鴻章入都

陛見謝

恩繳回

欽差大臣關防出都後與諸統將酌議將弁勇之久役思歸者
補給欠餉陸續遣散計銘軍裁遣馬隊一營鼎軍裁馬
隊三營步隊八營武毅軍裁遣馬隊七營步隊十營盛
軍裁遣馬隊二營唐仁廉所部仁軍裁遣馬隊三營樹

續修廬州府志

卷九十九

平捻紀畧下

五十一

軍裁遣馬隊三營勛軍時亦南還裁遣馬隊三營步隊
十營合共遣撤馬步隊五十營勇夫踰三萬人鴻章乃
與大學士新任直隸總督曾國藩新任兩江總督馬新
貽等通籌大局會奏曰中原及東南各省粵捻各逆擾
攘幾二十年費無數人力財力艱苦經營始克奏功臣
等身在局中極知挽回不易現在用兵甫靖省分降眾
散勇無業可歸會匪游民到處勾結徒以懾於軍威不
敢妄動亂機之來往往起於微而乘於忽若不稍留勁
旅以資鎮壓一有警變召募遠調均非易易至不可收
拾而後補苴之惜目下之小費忘日後之巨患臣等何
敢出此茲公同酌定銘軍馬步人數較多紀律素嚴暫

令臬司劉盛藻統帶駐紮河北東昌張秋一帶臣國藩以直隸練軍尚未定議北路不宜太空俟履任有期當再察酌調遣濟甯居南北要衝潘鼎新所部僅留七營兩哨駐防該司到任後隨事稟商山東撫臣相機酌辦江蘇徐州毘連東皖豫邊界土匪出沒無常最爲重鎮弁兵分汛巡防並馬步勇四營仍嫌單薄暫留提督吳長慶步勇八營馬隊三營擇要駐扼會同徐州鎮道協力妥辦又蘇境沿江千餘里伏莽殊多空虛尤甚擬令道員段喆俟撤遣就緒帶勛字五營擇要移駐與長江水師聯絡巡緝稍壯聲威金陵爲東南關鍵城大兵單現經臣國藩留湘勇星豫三營駐防城內臣鴻章擬留

總兵劉玉龍開花礮隊一營仍紮下關江口均交臣新貽等酌量調遣臣鴻章將赴湖廣本任該省居上游四戰之地游匪肆行防勇尚未盡撤非帶親軍前往難以鈐制擬將提督郭松林裁贖步隊五營總兵周盛傳裁贖九營馬隊三營並親兵鎗炮隊二營調令隨去以便汰弱留強備豫征調以上留防各軍臣等再三籌議按時度勢因地制宜誠屬必不可少餉需漸已節省除潘鼎新所部月餉由山東解濟現以本省藩司裁贖之軍留防本境應請

旨仍飭東省酌減籌濟其餘各營本食蘇餉應由蘇省分別籌解接濟仍由臣等隨時會商妥酌俟各路游勇斂迹邊

患漸紓地方可臻奠固再行次第裁撤其豫籌撤勇經費奉

旨令李瀚章劉坤一於浙江江西各借撥銀二十萬兩郭柏蔭何璟於湖北借撥銀十萬兩以便遣撤各軍於是淮軍散伍歸農之士補餉給足歡呼樂凱自來用兵善後莫能及此

